



**Les Fleurs Des Vies Des Saints Et Des Festes De Toute  
L'Annee, Svivant L'Vsage Dv Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromee, & de Sainte Françoise ; Avec le Mertyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

IV La vie de saint Lucie, Pape & martyr.

---

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)



le del' honneur de Dieu, & pour seruir d'exemple aux autres, elle la reprint aigrement, & luy donna vn soufflet sur la iouë: en signe de ce que Dieu l'auoit incitée à cela, les doigts de sa main demeurèrent depuis empreints sur la iouë de sa niepce tandis qu'elle vescu.

Après qu'elle eut vescu 15. ans en ceste sainte resolution, edifiant toutes les autres Religieuses, admirée de tout le monde, la sainte Imperatrice tomba en vne grosse fièvre, qui luy fit iuger qu'elle approchoit de sa fin: & estant en l'agonie, comme on preparoit les choses necessaires à son enterrement, elle veid qu'on mettoit sur le cercueil vn riche drap d'or: alors se tournant vers les Religieuses, elle leur dit: Ostez ce drap qui n'est pas pour moy, ie suis sortie nuë du ventre de ma mere, & ie retourneray aussi nuë en terre, qui est ma mere. Couurez mon corps d'vn chetif vestement, & l'enterrez aupres de Henry mon Seigneur & mon frere qui m'appelle. Disant cela, elle rendit l'esprit à nostre seigneur, & son corps fut mis où elle auoit dit, neantmoins avec vn tel abord de peuple, que les villages circonuoisins demouroient tous deserts pour voir ce corps saint, & toucher la biere où il estoit, & assister à son enterrement. La foule fut si grande, qu'on fut trois iours auant que de la pouuoit enterrer, & nostre Seigneur illustra la sainte Imperatrice de plusieurs miracles, & plusieurs malades prians à son sepulchre, obtindrent guerison par son intercession. Le Martyrologe Romain fait mention d'elle le 3. de Mars. Surius raconte sa vie en son second Tome, & d'autres auteurs des choses d'Allemagne, & des vies des Empereurs, & le Supplément des Histoires parlent d'elle.

*A Cesarée ville de Palestine decederent les saints martyrs Marin soldat, & Asterie Senateur, du temps de l'Empereur Gallien. Marin ayant esté accusé par vn sien compagnon, eut la teste tranchée, & Asterie ayant estendu sa robe de pourpre, & presté l'espaule pour receuoir comme vn précieux ioyau, le corps du saint martyr, receut incontinent le loyer de l'honneur qu'il luy auoit porté, gagnant luy-mesme la couronne du martyre. En Espagne les saints martyrs Hemiter & Chelodore, lesquels estans en l'armée qui sejournoit pour lors à Leon ville de Galice, la persecution s'estenant contre les Chrestiens, furent comme tels menez à la ville de Calahorre, où ils receurent la palme du martyre. A mesme iour endurerent les saints Felix, Luciole, Fortuné, & Marcia avec ses compagnons. Item les saints soldats Cleonice, Eutrope, & Basilique, lesquels durant la persecution de Maximian, sous le president Aclepiade, furent crucifiez. A Bambergue deceda sainte Cuneconde Emperiere, laquelle ayant espousé Henry premier Empereur, demeura neantmoins vierge par permission de son mary, fit beaucoup de saintes ceuures durant sa vie, & apres sa mort plusieurs miracles.*

LA VIE DE SAINT LUCIE  
Pape & Martyr.



V bannissement que saint Corneille Pape & Martyr endura pour nostre Sauueur Iesus Christ, il fut accompagné de saint Lucie, qui estoit Prestre & fils de Porphyre citoyen Romain, lequel apres

le martyre de saint Corneille, luy succeda au siege Apostolique, du temps des Empereurs Galus & Volusius, desquels il fut ainsi enuoyé en exil, & depuis par la volonté de nostre Seigneur reintegré dans son siege. Saint Cyprian luy escriuit vne epistre pour le congratuler de son retour, en laquelle entr'autres choses, il luy dit ces mots: *Il n'y a gueres, mon tres-cher frere, que ie me resioys par lettres avec vous: quand nostre Seigneur vous honora du degré de Prestre & de Confesseur au gouvernement de son Eglise: nous vous congratulons derechef, & vos compagnons aussi, & tous les autres freres: car il vous a rendu à vostre Eglise avec la mesme gloire, & à vostre grande loüange, afin que son troupeau ne fust point degarny de Pasteur, ny son vaisseau de Pilote pour le conduire, son peuple de Gouverneur, & qu'on sceust qu'il auoit ordonné vostre exil, non pour priuer l'Eglise de son Euesque, mais afin qu'il y retournaist plus riche de merites & victoires. Car la dignité du martyre ne fust pas diminuée es trois enfans qui sortirent sains & sauez de la fournaise de Babylone, & Daniel ne laissa d'estre par fait & digne de grande loüange, pour auoir esté preferuë par le Dieu viuant, des lions ausquels il auoit esté exposé pour estre deuoré. Es Confesseurs de Iesus-Christ le martyre qui se diffuse, n'amourrit point le merue de leur Confession, ains il tesmoigne la grandeur de l'appuy & protection de Dieu.* Le mesme saint Cyprian le loüte fort en vne autre Epistre avec son predecesseur saint Corneille Pape, & dit qu'ils furent remplis du saint Esprit, & glorieux Martyrs de nostre Seigneur Iesus-Christ.

Saint Lucie commanda que deux Prestres & trois Diacres accompagnassent tousiours l'Euesque pour estre comme tesmoins & Iuges de sa vie, afin que leur presence l'innitast à mener vne vie reiglée, & que persône ne fust si osé d'en mal parler, scachant qu'il auoit des tesmoins pour prouuer son innocence. Dieu pour chastier les Gentils qui persecutoient estrangement nostre sainte Religion, & n'estoient iamais allouuis du sang des Chrestiens, enuoya de son temps vne grande peste qui dura dix ans, laquelle sortit d'Ethiopie, & se respandit par toutes les Prouinces du monde: & à peine y eut-il ville, ny village, ny maison qui n'en fust frappée, avec vne telle & violente rigueur, qu'il mourut plus de la moitié des habitans de la terre.

Saint Lucie tint deux fois les ordres, esquels il fit quatre Prestres, quatre Diacres, & sept Euesques. Il fut couronné du martyre sous les Empereurs Gallus & Volutien: encore que le Martyrologe Romain, & autres auteurs disent qu'il mourut en la persecution de Valerien, à cause que du temps qu'il estoit Censeur, il, fit des loix contre les Chrestiens, que ces Empereurs garderent depuis, & Valerien luy-mesme. Comme l'on menoit saint Lucie au martyre, il receut commanda l'Eglise & ses brebis à Estienne, son Archidiacre, lequel luy succeda au Pörficat. Eusebe dit, que Lucie ne fut que 8. mois Pape, mais ayant tenu les Ordres deux fois, cöme il est dit au liure des Pontifes Romains, il faut necessairement qu'il l'ait esté plus long-temps. Il mourut l'au de



4. MARS  
nostre Seigneur deux cents nonante, & fut enterré au cimetiere de Calixte: & Clement VIII. au Breuiaire reformé, a mis la feste de saint Lucie Pape & Martyr, le quatriesme de Mars. Tous les Martyrologes Romains, Beda, Vsiard, & Adon font mention de luy.

A Rome sur le chemin qui meine à Saint Sebastien. trespassa Saint Luce Pape & Martyr, lequel succeda à Saint Cornille, & durant la rage de la persecution de Valerian fut banny, puis ayant beaucoup travaillé contre les Nouations, eut la teste tranchée; Saint Cyprian le loué grandement. La mesme moururent neuf cents martyrs, enseuelis au cimetiere de Calixte. pres du sepulchre de sainte Cecile. A mesme iour se fait la feste de Saint Caie courtsan, qui fut ierri dans la mer, & d'autres vingt-sept. A Nicomedie qu'on nomme à present Comedia, endurerent Saint Adrian martyr, & autres vingt-trois lesquels eurent les cuisses casées sous l'Empereur Diocletian. On fait la feste de Saint Adrian le huitiesme iour de Septembre. parce qu'à tel iour son corps fut transporté à Rome. Item les SS. Archelai, Cyrille & Photie. A mesme iour sainte Herayde martyre. A Cherson les Saints Euesques, Basile, Eugene, Agathodore, Elpidie, Ethevic, Capiton, Ephrem, Nestor & Arcade. A Vilne en Lithuanie deceda Saint Casimie fils du Roy Casimire, canonisé par le Pape Leon X. de ce nom.

5. MARS  
En Antioche mourut saint Phocas martyr, lequel apres auoir enduré plusieurs miseres pour l'amour de nostre Sauueur, triompha glorieusement de l'ancien serpent. Ce qui est confirmé iusques à present par un continuel miracle. Car si quelqu'un est mordu par quelque serpent, s'en allant avec vne vne foy à l'Eglise de ce Saint martyr, au si tost qu'il arrive à la porte il est guery. A Cesarée ville de Palestine trespassa Saint Adrian martyr, lequel durant la persecution de Diocletian sous le President Firmilien, fut exposé à un lyon, & puis decapité. A mesme iour endura Saint Eusebe courtsan, avec autres neuf. A Cesarée en Palestine Saint Theophil Euesque & Confesseur, renommé pour sa doctrine & sainteté, durant l'Empire de Iulien. Item sur le bord de la fleuve Iordain S. Gerasime Anacorette, qui florissoit du temps de l'Empereur Zenon.

6. MARS  
A Comidia, iadis Nicomedie, decederent les Saints martyrs Victor, & Victorin, lesquels par l'espace de trois ans furent tourmentez en diuerses facons, avec Claudian & Bassa son épouse, & moururent en prison. A Constantinople se fait la feste de Saint Euegnes, lequel fut eueque de ladite ville du temps de l'Empereur Valens, & par luy enuoyé en exil, où il mourut. En l'isle de Cypre saint Conon martyr ayant en les pieds percez avec des clous durant la persecution de Dece, comme on le vouloit forcer de courir deuant un coche, se mit à genoux, & rendit son esprit à Dieu en priant. A mesme iour moururent quarante deux martyrs, lesquels ayant esté pris en Amorie furent menez en Syrie, & la martyrizez. A Boulougne Saint Blaise Euesque, lequel ayant esté sacré par S. Siluestre Pape, gouerna par parole & exemple tres-sainctement l'Eglise qui luy auoit esté donnée en charge.

LA VIE DE SAINT THOMAS d'Aquin, Confesseur & Docteur.



7. MARS  
E bien-heureux saint Thomas d'Aquin, lumiere de l'Eglise Catholique, Docteur Angelique, la plus seure guide des Escholes, l'ornement & la gloire du saint Ordre des Iacobins, estoit tres-noble, fils des Comtes d'Aquin. Son pere se nommoit L'adulphe, & sa mere Theodore. Côme elle estoit enceinte de saint Thomas, il vint vn Her-

mite verselle, homme saint, qui portoit au col vne petite image de nostre Dame, aux pieds de laquelle il y auoit vn portraict de saint Dominique, lequel luy dit que Dieu l'illumineroit, & qu'elle auroit vn fils qui prendroit l'habit de saint Dominique; & seroit l'honneur de sa race, & le flambeau du monde. Theodore luy respondit: La volonté de Dieu soit faite. Le saint enfant venant au monde, fut receu de ses parens, comme estant donné de la main de Dieu, il fut nommé sur les fonds de Baptême Thomas, par son ayeul paternel, qui fut le Comte Thomas de Samacolle grand mignon de l'Empereur Federic II. & son Capitaine general en plusieurs expeditions. Sa nourrice le voulant vne fois emmailloter, trouua que le benit enfant tenoit vn papier en ses petites mains, & le luy voulant oster pour l'enuelopper à son aise, l'enfant cria tant, qu'il le luy salut laisser, & depuis sa mere en le defaisant, le luy tira des mains, & trouua escrit dedans *Aue Maria*, & voyant qu'il ne cessoit de crier apres, on fut contraint de luy rendre pour l'appaiser: & lors il le porta à sa bouche, & le mascha peu à peu avec les genciues, & l'aualla, monstrant qu'il succoit avec le lait, l'amour de la tres-pure Vierge, duquel il fut toute sa vie tres-deuot. Au temps de son enfance, quand il croit, le meilleur remede qu'on trouuoit pour l'appaiser, c'estoit de luy bailler quelque liure à feuiller, & il se taisoit tout aussi-tost. Quand il eut cinq ans, ses parens l'enuoyerent au celebre Monastere du mont Cassin, afin qu'il prist dès son ieune aage parmy ces bons Religieux, l'amour & la sainte crainte de Dieu. D'autant que le glorieux Patriarche saint Benoist, sçachant combien il importoit à la reformatiõ & bon gouuernement de la republique, que les enfans des bonnes maisons soient bien nourris dès leur ieunesse, pour faire seruire à nostre Seigneur, vn bien-faict si important au monde, se chargea durant sa vie de nourrir en son Couuent du mont Cassin, quelques enfans de Gentil-hommes, sans entrer en consideration de la quietude, & du silence dont les Moines font profession; & laissa ceste louable institution à ses enfans & successeurs, laquelle duroit encore du temps que naquait saint Thomas, lequel surpassa tous les autres enfans qui y estoient nourris quant & luy en la tranquillité, en la douceur, au silence, & en la modestie, en l'obeyssance au maistre qui l'instruisoit, en la discretion, fuyant tousiours les autres qui estoient turbulents & sans arrest, & faisant cõpagnie à ceux qu'il voyoit plus posez & deuots; car de luy il l'estoit tellement, qu'il employoit chaque iour deux heures en oraisõ, & d'vne pieuse curiosité demandoit souuent au Religieux qui l'instruisoit, que c'estoit que Dieu: il retenoit en sa memoire, & gardoit en sõ cœur les bõs conseils qu'il luy donoit. Quand il eut 10. ans, on l'enuoya estudier à Naples: il eut pour maistre en la Grammaire, Rhetorique & Dialectique, vn grad hõme appellé Martin, & en la Philosophie vn autre aussi excellent, qu'on nommoit Pierre d'Ayberne, (c'est l'Irlande) d'où il estoit venu pour lire en Italis.